

# Updoon – neet wegdoon!

Van de Tafels in Düütskland hebben ji seker al höört. Dat giff haast dusend in uns Land. Eten un Drinken mit en knappe MHD word van Freeiwilligen bi de Kooplüü un grote Supermarkten in-sammelt, un denn na de Tafels henbrocht. Daar könen Lüü mit en leeg Inkommen un ok Minsken, de up Hülp anwesen sünd, de Saken denn goodkoop of deelwies umsünst ofhalen.

Wied mehr as 250.000 Tünnen an Eetwark un Drinkeree worden up disse Aard un Wies vör dat Wegsmieten bewahrt. Wi proten hier van 250 Millionen Kilo Eetwaar! Mehr as een Million Minsken in Düütskland hebben daar wat van. Neet blot in grote Steden as Berlin, Hambörg of Köln. Ok in Oostfreesland giff dat disse Tafels an verscheden Steden. Överall giff dat Minsken, de daar up anwesen sünd. So word Eten un Drinken neet wegsmeten. Dat kummt bi de Lüü an,



Viele Menschen sind auf Tafeln angewiesen. FOTO: GOLLNOW/DPA

de 't bruken könen. Deelwies gahn de Kooplüü nu aver ok al neje Paden. Ik kenn to en Bispööl en lüttje Supermarkt, de Bananen un Tuffels, wenn de al en bietje d'röver sünd, stuuv bi de Kasse utlegt. Van de Bananen kann sük denn elk un een so wat wegnehmen. De kösten nix.

Up de Maneer worden de Bananen denn futt unnerwegens eten un neet wegsmeten. Van de Tuffels dürt een sük ok en Kooksel mitnehmen. De sünd för all Lüü docht. Daar mutt een kien Nawies för paraat hebben.

So giff dat alltied mehr Steden, de Eetwaar vör dat Wegsmieten bewahren. Ok hier up 't Eiland. Hier kann een saterdags na de Grundschool henkomen, en lüttje Spann ofgeven, un daar denn en bunte Büdel för mit na Huus nehmen. Daar is Eetwaar un Drinkeree mit en knappe MHD in – of

ok Saisonwaar. So hebb ik al de mooiste un leckerste Wiehnachtszuckerlaa in Januar maant mit na Huus hen brocht. Faken sünd in disse bunte Büdels ok Nudels in, waar boven de Plastikpiüt en bietje anreten is. Daar is ja nix mit! Un butendeem worden Nudels kookt.

Dat Projekt is för all Lüü up de Insel docht. Daar mutt sük nüms för schamen, wenn he daar henkomen deit. Daar mutt ok nüms Nood un hebben, dat he annerseen wat wegnehmen deit. Bi dat Projekt treffen sük heel verscheden Minsken up de Schoolhoff, proten mitnanner un halen sük wat för hör Mahltieden of. Updoon – neet wegdoon!

## KOLUMNE

Moin, Moin  
**Schrievers** moje  
allerbest Pläseer **Spraak** hoop  
Vertellsel  
Smüstern

Platt maakt



Antje Lüb-ben